



Sesida dals

10 da favrer 2025

Communitgà ils

11 da favrer 2025

Protocol nr.

79/2025

Dumonda da la fracziun da la PS

concernent l'Agid a victimas dal Grischun (emprima sutsegnadra Rutishauser)

Resposta da la Regenza

Las prestaziuns da l'Agid a victimas sa basan sin la Lescha federala davart l'agid a victimas da delicts e cumpiglian: la cussegliaziun e l'agid immediat, l'agid a pli lunga vista, l'indemnisaziun, la prestaziun da satisfacziun morala e la liberaziun dals custs da procedura (art. 2 Lescha davart l'agid a victimas, LAVi; CS 312.5). La cussegliaziun da l'Agid a victimas sa drizza a persunas ch'èn vegnidas donnegiadas corporalmain, psichicamain u sexualmain tras in delict en Svizra. La cussegliaziun è gratuita, confidenziala e sin giavisch anonima. Las persunas spezializadas da l'Agid a victimas cusseglian las persunas pertutgadas en l'entir chantun, al lieu u per telefon, e sa rendan en cas da basegn er en las regiuns.

Particularmain las victimas da violenza a chasa e da violenza sexuala na sa drizzan savens betg da sai anora als posts da las autoritads, perquai ch'ellas sa vargugnan, han conflicts da loialitad, tema da consequenzas famigliaras ed ina dependenza emoziunala e finanziaala. Ellas han savens basegn d'in sustegn e d'ina intervenziun d'ordaifer, da l'ambient social u da persunas spezializadas. En passa 60 pertschient dals cas da cussegliaziun èn las victimas u lur confamigliars sa drizzads l'onn 2023 directamain al Post da cussegliaziun per l'agid a victimas.

Per pudair sustegnair effectivamain las victimas da violenza, èsi indispensabel d'avair ina buna rait ed in bun barat tranter ils acturs chantunals ed er interchantunals. Per quest motiv è il Post da cussegliaziun per l'agid a victimas represchentà en divers gremis. Tras la stretga collavuraziun, tranter auter a las maisas radundas davart violenza a chasa u commerzi cun umans, ma er tras il barat specific interchantunal pon las resursas disponiblas vegnir colliadas.

Il basegn da purschidas novas u adattadas vegn examinà cuntinuadamain. A partir dal 2025 cumenza in project da pilot da 4 onns per sustegnair las persunas spezializadas e las persunas da referiment en la protecziun d'uffants. Entaifer il Post da cussegliaziun per l'agid a victimas cumpiglia quest project in post spezialisà e da coordinaziun per la cussegliaziun anonima e per la valitaziun d'ina eventuala periclitaziun

dal bainstar da l'uffant. Ultra da quai porscha l'Agid a victimas dal Grischun a partir dal november 2025 – en il rom d'ina purschida per l'entira Svizra – durant 24 uras in numer d'urgenza per victimas da violenza.

Tar la dumonda 1: Il Post da cussegliaziun per l'agid a victimas dispona da personal cun blera experientscha e buna scolaziun. Tut las collavuraturas e tut ils collavuraturists ston absolver obligatoricamain il curs specific per l'agid a victimas. Ultra da quai frequentan las collavuraturas ed ils collavuraturists cuntinuadamain scolaziuns e furmaziuns supplementaras. Las collavuraturas ed ils collavuraturists dal Post da cussegliaziun per l'agid a victimas exequeschan cun la Lescha davart l'agid a victimas ina incumbensa ch'è reglada cleramain en la lescha federala. Il Post da cussegliaziun per l'agid a victimas ha uschia las cumpetenzas ed il spazi d'agir necessari. Sin fundament dals dumbers da cas creschids reconuscha la Regenza il basegn per dapli personal. Pervia da la directiva da la politica da finanzas nr. 6, che limitescha l'augment da la summa totala dals salaris, èn las pussaivladads d'agir da la Regenza limitadas.

Tar las dumondas 2-4: Per pudair sustegnair il pli bain pussaivel las persunas directamain pertutgadas ha l'Agid a victimas bunas colliaziuns entaifer il chantun ed er cun acturs interchantunals. L'Uffizi dal servetsch social coordinescha il meglier pussaivel las resursas disponiblas, p.ex. cun la campagna da sensibilisaziun interchantunala Toxic Love, ch'i dat en trais linguas e ch'è vegnida iniziada dal Post da coordinaziun cunter violenza a chasa dal Grischun. Nov chantuns da la Svizra tudestga sa participeschan a la campagna che duai render anc pli enconuschents ils posts da cussegliaziun per l'agid a victimas. Questa campagna è vegnida realisada en l'entir chantun Grischun. Ultra da quai s'engascha il Post da cussegliaziun per l'agid a victimas activamain a favur dals Dis d'acziun cunter violenza a chasa, che han lieu minga onn, quai cun atgnas acziuns, cun referats specifics u cun discussiuns al podium per focussar las cumpetenzas e las resursas en la lavur da prevenziun e da sensibilisaziun.

Tar la dumonda 5: Il numer d'urgenza central ch'è disponibel durant 24 uras per las victimas da violenza sco er il Post specialisà e da coordinaziun per la protecziun d'uffants vegnan actualmain sviluppads ed introducids en il decurs dal 2025.



En num da la Regenza

Il president:

Marcus Caduff

Il chancelier:

Daniel Spadin